

QUÆSTIO MEDICA.
 QUODLIBETARIIS DISPUTATIONIBUS
 MANE DISCUTIENDA
 IN SCHOLIS MEDICORUM,

Dic Jovis 13^a Januarii 1718.

M. FRANCISCO MAILLARD,
 DOCTORE MEDICO, PRÆSIDE.

An Mulieres pluribus obnoxia morbis, quàm Viri?

I.

HUMAN A gens, etsi ratione superior cæteris ani-
 mantibus, inferior tamen aliundè est, gravioribus
 jactata malis: Homini coævam ne putes causam tantæ ca-
 lamitatis: Mortalium primus in lucem prodierat integer
 vitæ morbique purus; at suo vix recens à Conditore ruit
 per vetitum nefas, divinæ Legis immemor; hinc ab origine
 degener, traditus morbis ac letho fuit, rebellionis suæ pœ-
 nas daturus; & (quod deplorandum magis) hæc unius
 Viri culpa Posteris omnes facit etiamnunc reos læsæ Divi-
 nitatis: Indè Hominum quisque tam multis adhuc plecti-
 tur ægreditudinibus, corporis, animi.

II.

MULIER humanitatis pars altera, labis & antiquæ
 conscia, nunquid, ut Viro nocentior, sic & plures
 ad morbos damnata? Suos & alienos nonne patitur manes,



cùm virilia quæ contrahit mala, fœmineis addit vitiis longè deterioribus: Procreat hæc vitia muliebri corpus è peiori luto fortè coagmentatum; alit & uterina colluvies, dùm suppressæ Mensium vel Lochiorum fæces in principum viscerum lares sæpiùs importantur; undè tot affectus *ασθενειαι*, tot strangulatus, viris ignoti, fœminis familiares. Quin & illæ mulierum sordes, si diutiùs in utero retentæ computruerint, hospiti suo quot infligunt ictus & plagas insanabiles! eâ quoque de causâ, Mulieres non paucas exhauriunt fluores albi, virulenti; rodunt alias ulcera, *καρκινωματωδεις*, quæ Mares haud attingunt.

I I I.

QUAM variis insuper empta doloribus, quæ fœminæ graviditatem præcurrit, levis aura voluptatis! animi defectio, nausea, vomitio, nùm prima sunt fœtæ conjugis indicia? Reliquo gestationis tempore, *δυστατοια*, stupore, *καφλαδι* propè funeratas urget adhuc Mulieres instantis labor puerperii, vel aborsûs periculosioris: Extant & prolis avidæ, quæ, dùm prægnantis uteri pompâ gloriantur, molam parturiunt exuberantis fœturam sanguinis, repetitâ vasorum depletionis præcavendam: Porrò, fœcundi latices, quos ad infantis lactationem mammæ congerunt, si vitium ceperint, fœminis quid non portendunt mali? Planè, si qua virorum propria mulieribus olim pepercerat ægritudo, nunc in eas sævit vehementiùs, non mutatâ sexûs naturâ, sed vitâ, quæ nostrates fœminas degeneres arguit à veterum temperantiâ: Quoties his illæ temporibus suâ de sanitate parùm sollicitæ, per solidos dies totæ sunt in talis & aleâ, vel nocturnis succumbunt comestationibus, quas impunè ferunt Viri Fœminis valentiores.

I V.

IR A demùm, mœror, ambitio, vindicta, desperatio, rariores aut leviores in viris, fragilem sexum cur frequentiùs, cur pluribus excruciant modis? Inconstantia pariter, quæ paucos cadit in Viros, omnium ferè Mulierum comes est & socia. An ea propter tot hodiè Conjuges, Aulicæ, Plebeicæ, divortium meditantur, quæ nuper ambiebant innuptæ matrimonium? Suspicias è contrâ tenaces

Connubii Viros, suâque sorte contentos. Amor ipse, quem vituperare Sexui facilius est, quàm vitare, si parcit Viris, quid non muliebria pectora cogit! E millibus unum furere vix audias amantem: è Mulieribus, quot bacchantur Veneris æstro percitæ! Rumpunt interdum vincula vel durissima; tollunt & onera, quibus sint impares Athletarum lacerati. Quamplures videas, quæ desipiunt ingeniosè, quæ flent, rident, miscent & seria joci: aliæ (si populo fides) peregrinas effutiant ignotæ sibi linguæ voculas: Est ubi ferè jacent inanimæ, sine pulsu, voce, spiritu: Est ubi concutiuntur effrenatè, mox & horrendos jactant ululatus. In Viduis, in Virginibus, adèò stupendas corporis & animi commotiones ad ^{dispositas} si retuleris, te latet insana quid Fœmina possit: hæc portenta suscitatur uterus, cui si denegaveris quod sitienter appetit, novas ille faces accendit in præcordiis, turbat & loca, quæ frequentat animus. Interea quàm brevè concidunt Sexûs imbellis vires, dùm naturæ modum superare videntur! quàm fugax pulchritudinis ornamentum, quo superbiunt Mulieres! si tot illæ morbis, dilapsæ velut in cineres facie, miserè deformantur. Nec minùs suum dedecorant sexum, quæ barbata, quæ villis hirsuta vegrandi Clitoride Viros mentiuntur: Eas utroque sexu potentes ne credideris; vanum hoc & insolens virilitatis simulachrum morbus est Fœminarum gregi peculiaris. Reperias alibi nonnullas hæmorrhoidibus, pleuritide, simul & menstruo fluxu cruentatas: his discas ab ægrotantibus, fœmineum sanguinem purgatione menstruâ non omninò defæcari. Visæ quoque sunt in ætatulâ primâ puellulæ, quibus ab ipso matris ubere pendentibus ros quidam cruentus, statò tempore, stillavit ab utero: An luculento futuræ sterilitatis argumento! Fuerunt & adultæ Virgines, quibus per os, aures, oculos, papillas, digitos, uno quoque mense sanguis erumperet; quasi non expurgatus per loca muliebria, superis in partibus identidem luxuriaret, ibi vasa disrupturus: His ab affectibus si fuerint immunes Viri, si minùs multis, quàm fœminina gens, aliis urgeantur vitis; quis dubitat uter sexus sit infirmior?

V.

NE quæras igitur à Muliere, quæ valeat, sed ubi doleat, eoque magis quòd fœminei corporis compages

undique laxa est, mollis, & in vitium flecti cerea : secùs in virili corpore, stat firma partium conjunctio, quas morbi vis haud faciliè ferit. Quid quod, eadem si mali labes Virum simul & Fœminam semel invaserit, hæc tardiùs, ille citiùs ut plurimum convalescit : dispar hic exitus, aut à naturâ quæ vegetior in Maribus, aut ab arte Medicâ, cui plures confidunt Viri, quam Fœminæ. Reverà, quot ægræ non ita pridem Mulierculæ, spretis fastidiosè remediis, interiêre. Cæterùm, si sanitatis vindex exercitatio, si morbus otiosorum hominum commune stipendium est, rariùs ægrotabunt Viri, qui frequentius exercentur : navigant, venantur, equitant ætate, hyeme, sustinent & belli, vel togæ labores : sic effectricem morborum causam fugiunt ignaviam. Quàm diversa Mulierum conditio : quæ tot salubria non dividunt cum Viris exercitia, sed in umbrâ parietum torpescences, eam sæpè colligunt humorum redundantium copiam, quæ vel exasperat ingenta Sexui mala, vel nova parit, vix ullis in posterum medicamentis eradenda

Ergo Mulieres pluribus obnoxia morbis, quàm Viri.

DOMINI DOCTORES DISPUTATURI.

| | | |
|---|----------------------------|--|
| M. Franciscus Giot. | M. Petrus - Antonius Lepy. | M. Franciscus Maillard, aëus Praeses. |
| M. Franciscus - Antonius le Dran. | M. Elias Col de Villars. | M. Petrus - Paulus Guyart, Regi Mulierorum Nosocomii Medicus Ordinarius. |
| M. Antonius le Moine Pharmacia Professor. | M. Henricus Bessnier. | M. Ludovicus Poirier, Antiquus Facultatis Decanus, Regi à sanctioribus Consiliis, Archiaterorum Comes. |

Proponebat Parisiis GABRIEL-ANTONIUS JACQUES,
Parisinus, Baccalaureus Medicus, A. R. S. H. 1718.
à sextâ ad meridiem.